

Minister di Deporte Endy Croes den reunion di Parlamento tocante SSA

“Vrolijk a acepta, cu e kier yega na un areglo di pago, pero mi no a acepta esaki”

Ayera a tuma luga na Parlamento di Aruba, un reunion publico basta extenso cu minister demisionario di Enseñansa y Deporte, Endy Croes, pa loke ta trata e investigacion cu a cuminsa door di irregularidadnan di Stichting Sportsubsidie Aruba (SSA) caminda a afirma cu a entrega un mocion di desconfianza contra su persona.

A traves di Comision di Deporte, lider di fraccion di MEP, Hendrick Tevreden a pidi un reunion publico pa haya un splicacion di lo cual ta SSA y loke ta sucediendo cu e instancia aki, mirando cu un di su ex-miembro di inicialnan K.V ta bao investigacion pa irregularidadnan cometi cu fondonan di subsidio.

Den su splicacion unda el a presenta algun documentonan, minister Endy Croes a papia tocante instancia mes e cual ta independiente di gobierno y cu a ser funda na aña 1999. Tambe el a papia tocante e organisacionnan cu ta haya subsidio pa aña unda el a señala cu for di 6 di september el a haya informacion di un rapport cu dos comprobante di presunto irregularidad, fraude of mal uso di fondonan.

Segun minister Croes “e realidad e tabata muestra den direccion cu ta proyecto di minister cual no tabata ta, e cartanan aki nunca a pasa den nos kantoor, bo ta mira no tin number di mi kantoor y tabatin un cu hasta a skirbi falso, pero e tin un firma di minister si,” el a sigura.

El a informa cu e persona en cuestion a admiti cu si, cu el a falsifica e carta y e firma y el a hasta a falsifica peticion. Un di e pruebanan ta un suma di 7,788 florin caminda a aparece un invoice unda a paga tres pasashi pa aña 2025 “cu number di e famia di e ex-director.”

E di dos prueba tabata di un voorbrief di un proyecto di minister e cual segun minister mes ta sigura cu no tabata un proyecto di dje, cu un carta falsifica di un organisacion di mixed martial arts unda a pidi un suma pa pasashinan y adicional den un extra-regeel



a solicita dos computer.

Siguientemente, minister Croes a tene un reunion cu K.V unda a firma un notulen y a bisa “cu el a bruha di token, el a kere cu el a usa su token personal y cu el a entrega e dos computer na e federacion, tur esaki ta notula y Landsrecherche tin esaki tambe.”

K.V a acepta cu el a falsifica firma, cu a falsifica peticionnan deportivo y a acepta cu el a agrega regeel na e peticion deportivo ey, manera minister Croes a conta.

Raad van Toezicht a sigui haci su investigacion caminda nan a haya mas informacion tocante mas documentonan cu no a yega di pasa den bureau di minister Croes pero cu si tabatin firma y stempel, den esaki a constata cu tres hende tabata haya un suma di placa constantemente “mi ta bolbe bisa, te cu awe nos no sa ken e tres persona aki ta” el a bisa y a agrega cu e tres persona aki ta esun cu a ricibi placa den un forma structural e cual a yega te 158,835 florin.

“Esaki Vrolijk a acepta, cu e kier yega na un areglo di pago, etc. pero mi no a acepta esaki sin mas y a tuma stapnan corecto y 19 di september mi a haya WhatsApp di Landsrecherche y siguiente dia 20 di september mi a entrega e prome keho contra firma falsonan cu a tuma luga, e di dos keho a ser entrega door di Raad van Toezicht dia 25 di september” minister Croes a bisa.

Parlamentario Marisol Tromp a trece dilanti cu esaki tabata un reunion publico cu nan a pidi for di basta dia caba

y cu su persona a bay Ministerio Publico dia 26 di september pa entrega un keho contra e ex-director di SSA pa irregularidadnan cometi presuntamente. Den un carta dirigi na procurador general, Amelin Flanegin, el a splica cu el a haya documentonan cu “cu no ta cuestion di redo y cu ta a base di documentonan y ora bo les’e y bo ta wak di ki indole e ta cu ta nos deber como parlamentario a base di articulo 199 di Wetboek di Strafvordering cu den e caso aki nos por bay Ministerio Publico y haci un aangifte. Pero nan ta haya cu ta show y spectaculo algo asina serio,” Tromp a sigura.

Tocante e falsificacion, Tromp a cuestiona e hecho cu gobierno ta papia di digitalizacion y cu tin un procedura “p’esey ta straña mi cu full e papeleo aworaki por sucede te cu hard copy ta wordo di tal forma falsifica, supuestamente cu awe e ta bin bisa cu

e no ta di bo. Esaki ta un modus operandi bao di gobierno aki cu no ta sucede solamente eyden sino varios caminda.”

Ademas, el a trece dilanti cu tin basta documentonan di cosnan cu no a bay bon den ministerio aki, por ehemplo, un carta firma door di e minister Croes manda pa SSA “cua independencia, si stichting ta independiente e raad y e board ta responsabel personalmente pa asunto di placa.”

Den esaki, el a papia cu ta suppose cu e placa di ministerio mester bay pa deporte pero a muestra un carta di 13 di juni 2023 firma door di minister Croes unda ta pidi na Sr. De Cuba y e ta bay na SSA caminda ta trata di Weganan Escolar 2023 di evenemento.

“Mi tin gana di haya sa si esaki ta falsifica tambe, ta trata di un peticion pa pidi financiele steun pa un proyecto y e ta

pidi den su funcion, minister di Enseñansa y Deporte, duna 1,000 florin ter beschikking te stellen aan de volgende vendor: Sandra Croes. mInister ta haci’e, kiermen si e stichting ta independiente laga e persona haciele na stichting, ora a haci e peticion nos ta wak cu ta di un evento deportivo caminda e persona en cuestion ta un MC, pero e trabou ta tuma luga y ta cobra 1.000 florin pero na mesun momento ora bo wak ki compania ta cobr’e, e ta un compania di beauty yama ‘Blush’ cu pa colmo ta di e mesun persona aki y e cu e compania for di 5 di september 2018 ya no ta existi mas. E no ta cuadra cu e procedura, loke nos ta wak aki ta malversacion y mal uso di placa.”

E contesta di minister Croes pa esaki, el a bisa cu digitalisa no ta asina leu pa loke ta trata Ministerio di Deporte.

Tocante e invoice di e beauty salon, minister Croes a señala cu su ruman Sandra Croes a traha den tres evento como MC y cu e placa a bay riba cuenta di Sandra mes “e show rond di esaki a perde perspectiva di lo cual a pasa, pasobra esaki no tin nada di haber cu un firma di minister falsifica,” el a bisa.

Te ciere di edicion aki, e reunion publico te ainda tabata tumando luga. Bon Dia Aruba lo trece mas informacion di dje den un proximo edicion.

